

Segirezza

Segirezza vul dir esser liber da privels e da ristgs. Quest text definescha segirezzas cun la libertad da smanatschas tras criminalitad e violenza da tut gener.

Questa furma da segirezza ha adina puspè mancà en la Republica da las Trais Lias. Uschia rapporta Ulrich Campell en il 16. tschientaner, che viaggiatur vegnian attatgads en ils passadis stretgs da la Val da l'En,¹ e Johann Andreas von Sprecher scriva, che surtut las regiuns da transit impurtantas per il traffic transalpin dal 18. tschientaner sajan sco ch'i para stadas pertutgadas da delinquenza intensiva, en spezial en il Grischun dal Nord. Sco usità antruras na differenziescha von Sprecher betg tranter bandas criminalas, persunas a l'ur da la societad u senza domicil fix, manegia dentant che «grevs crims sajan mo darar vegnids commess da persunas indigenas». Degna da vegnir menziunada è per von Sprecher la banda da Kaspar da Tavanasa sco er quella da Taparelli, Ruffin e Casanova, spezialmain numna el dentant il capo bandit legendar dal Württemberg Hannikel, alias Jakob Reinhardt, cun il qual questa calamitad haja cuntanschì il punct culminant l'onn 1786.² 42.01

Friedrich Schiller aveva caracterisà gia 4 onns avant en ses toc da teater «Die Räuber» las Trais Lias sco «das Athen der heutigen Gauner». Quai ha provocà reacziuns plain gritta tar ils Grischuns, demussa dentant er che la republica aveva la reputaziun d'esser ina sort refugi per delinquents, e quai gia avant Hannikel.³ Igl ha bain dà pliras chatschas organisadas per sa deliberar da gruppas da persunas nungiavischadas, ma «igl è adina puspè gartegià a las bandas da s'infiltrar»,⁴ perquai ch'i na deva naginas competenzas centralisticas dal stadi en las Trais Lias, uschia ch'i n'è betg stà pussaivel da furmar organs da segirezza sur pliras vischnancas.



42.06

En cumparegliaziun cun auters chantuns disponiva il chantun Grischun a l'entschatta d'in pitschen corp da langeghers ch'è vegni engrondi fermamain ils emprims decennis dal 19. tsch. Illustraziun d'in langegher grischun enturn 1850.

42.07

Suenter la Segunda Guerra mundiala èn las pussaivladads tecnicas da la Polizia chantunala vegnidas meglieradas cuntinadamain. La fotografia mussa la Centrala d'alarm e d'acziuns da la Polizia chantunala dal Grischun ils onns 1970.

Il corp da langeghers, furmà 1804 suenter la fundaziun dal chantun, era al cumenzament fitg pitschen cun mo 8 umens. En il Grischun devi, quintà sin 100 000 abitants, mo gist 10 langeghers, en il chantun Son Gagl vischin eran quai bunamain 89.⁵ Ils langeghers grischuns eran staziunads a Mustér, a Spleia, en Surses, sin il Luziensteig, a Claustra, a Martina ed a Castasegna. Els stuevan patrugliar regularmain tras lur territori attribui e s'inscuntrar mintga 8 dis a La Punt/Rehanau per barattar infurmaziuns. Ils langeghers da l'Engiadina s'inscuntravan mintga 14 dis a Zernez. Ils langeghers dal Luziensteig e dal Partenz na faschevan betg part da quests inscuters. Mintga 2 mais vegnivan ils policists inspectads dal corporal e stuevan midar lur district.⁶ 42.01

Tranter 1804 e 1830 è il dumber da langeghers s'augmentà dad 8 sin 34. Cun endrizzar l'uffizi permanent d'in derschader inquisitur (1818) han ils langeghers survegni ina nova istanza da surveglianza cun dretg da dar directives. L'incumbensa principala era anc adina la refusa da «bagascha estra». La furmaziun da novs posts da langeghers ha levgià la controlla dal territori assegnà.⁷ Uschia è la rait da la preschientscha poliziala daventada pli e pli spessa. Cun divider il chantun en districts da polizia (1840) che vegnivan manads d'in cumissari da polizia è en pli naschida in'unitad d'organiziun sur tut il territori che steva en l'ierarchia tranter il derschader inquisitur ed il langegher. 42.02, 42.06

Suenter la Segunda Guerra mundiala èn il caracter e las incumbensas dals organs da segirtad sa midads fundamentalmain – or dal corp da langeghers è sa sviluppada ina Polizia chantunala moderna. Raschuns per quest svilup eran la mobilitad augmentada en il traffic sin via ed en il turissem, ma er ratas da criminalitad creschentas. Delicts spezialmain frequents eran l'enguladitschs da velos e da vehichels motorisads



42.01


Segirezza vers anen ed anora fin 1804

Ils enguladitschs che l'istoriograf J. A. von Sprecher numna il 19. tsch., sco er ils lieus da malfatgs da delinquents enconuschents e temids, inditgeschan ils centers da la delinquenza en la Republica dal Grischun. 1804 han ins organisà l'emprim corp da langeghers per augmentar la segirezza sin il territori chantunal.

■ centers da la delinquenza tar Sprecher
● lieus da delict da Hannikel
● lieu dal delict da Kaspar da Tavanasa
● lieu da delict dals Taparelli, Ruffins e Casanovas

Posts da langeghers 1804

→ turas dals langeghers
⊗ en l'uffizi da duana
⊗ faschond patruglia
⊗ en l'uffizi da duana e faschond patruglia
⊗ corporal
⊗ lieu d'inscunter (mintga 8 dis a La Punt/Rehanau, mintga 14 dis a Zernez)



42.02

Genesa da l'infrastructura poliziala, 1835-1840


Il 19. tsch. è l'infrastructura vegnida engronida consequentamain en il sectur da la segirezza interna ed il chantun è vegni dividi en districts da polizia. La rait da la preschientscha poliziala è vegnida pli e pli spessa.

Posts da langeghers 1835

⊗ uffizi da duana
⊗ faschond patruglia
⊕ praschun

Districts da polizia 1840

⊙ cumissari da polizia
⊙ derschader inquisitur (surveglianza dal corp da langeghers)
— cunfins dals districts da polizia



42 e ladernitschs en butias d'autoservetsch, a partir dals onns 1960 delicts da drogas sco er assagls da rapinament cun arma. Er la preschientscha da prostituadas e da ruffians da l'Austria ha occupà la polizia.⁸ Questas sfidas han gi per consequenza in ferm augment dal persunal en il corp da polizia, meglieraments cuntinuants sin il champ tecnic ed ina differenziaziun en divers secturs funcziunals, sco p.ex. Polizia da traffic e Polizia criminala. Ils ultims decennis ha la Polizia chantunala dentant serrà adina dapli posts en vischnancas pli pitschnas. 42.03, 42.04, 42.07

Per la segirtad e la controlla als cunfins esteriurs eran a l'entschatta medemamain responsabels ils langeghers chantunals. Il Corp federal da guardias da cunfin ha surpiglià questa incumbensa pir 1894, avant era el sa concentrà sin il cumbat cunter cuntribanda. Per las staziuns da duana era competent la Confederaziun gia dapi 1850. Suenter l'Emprima Guerra mundiala èn vegnidas vitiers controllas da persunas ed il cumbat cunter passagis da cunfin illegals. En il Grischun èn plinavant naschids durant l'Emprima Guerra mundiala ed ils onns sisur numerus pitschens posts da guardia da cunfin per lung dal cunfin tar l'Italia e tar l'Austria. Bliers dad els èn vegnids schliads successivamain suenter la Segunda Guerra mundiala, uschia che mo paucs posts da servetsch existan anc oz. Durant las duas guerras mundialas e durant la pandemia da corona (2020) è il traffic da cunfin per part vegnì restrenschi fermamain. 42.08

Dapi la fundaziun dal chantun hai dà midadas tar ils cunfins esteriurs dal Grischun, savens mo pitschnas, en singuls cas er pli grondas: Ina da quellas midadas è la modificaziun dal cunfin da duana tras l'exclusiun da Samignun e da la Val Sumpuoir (oriundamain vischnanca da Tschlin, oz Valsot) il 1892 e tras l'inclusiun dal Liechtenstein il 1924. 1948/49 ha il Principadi cedi a la Svizra – sut squitsch considerabel da Berna – l'Ellhorn al nord da Fläsch, per pudair integrar il nas dal grip en las fortizzas da l'armada en la regiun Sargans/St. Luziensteig. Il Liechtenstein ha persuentar survegni ina surfatscha medem gronda ed utilisabla per l'agricultura da 45 ha tar Balzers.⁹ 42.09 Il 1865 è il territori grischun ultra da quai creschi en la part sut dal Puschlav,¹⁰ nua che l'abitadi sparpaglià Cavaione, situà aut sur la val, è daventà svizzer.

il 1875 è la populaziun dentant vegnida naturalisada en la vischnanca da Brusio sin iniziativa dal chantun. Fin lura ha ella vivi «per uschè dir sin territori neutral, nua che nagin la mulestava cun taglias u cun clamadas en servetsch militar».¹¹ Betg cler n'era il cunfin anc ditg en la Valle di Lei, ina val laterala da la Val Farera. Sin la charta Dufour dal 1855 era questa val inditgada sco territori svizzer. Damai che la part sut dal Puschlav era per la Svizra pli impurtanta che la Valle di Lei, ha la Confederaziun desistì da la val alpina periferica en las tractativas cun l'Italia dals onns 1863/64. L'inundaziun da la val tras il Lago di Lei per producir electricitad ha gi per consequenza in'ulteriura correctura dal cunfin. Il Departament federal da militar ha pretendì ch'il mir da fermada stoppia sa chattar sin territori svizzer,¹² uschia ch'igl e stà da barattar ina surfatscha da var 0,5 kilometers quadrats. La nova lingia da cunfin vala dapi che la serra d'accumulaziun è vegnida messa en funcziun 1963. 42.05

1 Cf. p.ex. Campell 2021 (1573), tom. 1, p. 207.
2 Sprecher 2006 (1875), p. 292–299.
3 Jenal 1924, p. 91s.
4 Sprecher 2006 (1875), p. 293s.
5 Camenisch 2012, p. 34, ill. 4.
6 Ibid., p. 33, nota 133.
7 Ibid., p. 66.
8 175 Jahre Kantonspolizei Graubünden, p. 23.
9 Brunhart 1998.
10 Garbellini 2012.
11 Tognina 1963, p. 118.
12 Mani 1993, p. 325.



42.08 Durant l'Emprima e la Segunda Guerra mundiala e durant la pandemia da corona n'eri per part betg pussaivel da traversar il cunfin. L'illustraziun mussa il passagi da cunfin per peduns serrà a Castasegna il matg 2020.





42.09 L'Ellhorn, situà davant il Fläscherberg, è vegni cedi 1948/49 dal Principadi da Liechtenstein a la Svizra en il rom d'in barat da territori, quai per motivs militars e sut grond squitsch da Berna.

42.03 Preschientscha da la polizia en il Grischun, 1950 e 2023

Ina cumparegliaziun da la preschientscha da la polizia 1954 e 2023 mussa, ch'ins ha serrà bliers posts da polizia pitschens. I ha dentant er dà singuls posts novs, uschia p.ex. a Lai.

- posts da polizia 1954
- posts da polizia 2023

42.04 Svilup persunal corp da polizia Grischun, 1800–2022



42.05 Duana, guardia da cunfin e midadas dal cunfin, 1800–2022

Il 20. tsch. han ils organs da duana e da la guardia da cunfin manà numerus posts da controlla, 2022 existiva mo anc in pitschen dumber. L'arrundaziun dals cunfins en il Puschlav ed a l'Ellhorn sco er l'integraziun dal mir da fermada dal Lago di Lei en il territori dal stadi svizzer han gi raschuns da la politica da segirezza.

- midadas dal cunfin pli pitschnas
- cunfin en il Puschlav fin 1865
- inclusiun da duana Liechtenstein ed exclusiun da duana Samignun

Charta cun detagls Val di Lei



- posts da controlla 1804
- posts da controlla temporars il 20. tschientaner
- △ posts da controlla averts durant la 2. Guerra mundiala per manadiras da chavals e vehichels motorisads
- posts da duana 1865
- posts da servetsch actuals

